

春秋公羊經何氏釋例

春秋公羊經何氏釋例卷九

武進劉禮部逢祿申受著

侵伐戰圍八滅取邑例第二十五

莊十年二月公侵宋傳物者曰侵精者曰伐戰不言伐圍不言戰八不言圍滅不言八書其重者也

宣元年楚子鄭人侵陳遂侵宋注微者不得言遂楚子遂也不從鄭人去遂者尊者兼將

襄十九年晉士句帥師侵齊至穀聞齊侯卒乃還傳還善辭也大其不伐喪也大夫以君命出進退在大夫也

定四年三月公會劉子晉侯宋公蔡侯衛侯陳子鄭伯許男曹伯莒子邾婁子頓子胡子滕子薛伯杞伯小邾婁子齊國夏于

召陵侵楚注月而不舉重者善錄義兵

襄二十三年齊侯襲莒

案僖三十三年注輕行疾至不戒以入曰襲

桓四年蔡人衛人陳人從王伐鄭傳從王正也

桓十二年十有二月及鄭師伐宋丁未戰于宋傳戰不言伐言伐避嫌也嫌與鄭人戰也此偏戰也何以不言師敗績內不言戰言戰乃敗矣注宋不出主名者兵攻都城與郎同義

十四年宋人以齊人衛人蔡人陳人伐鄭傳以者行其意也

十五年十有一月公會齊侯宋公衛侯陳侯于侈伐鄭注不舉伐爲重者用兵重于會嫌月爲桓伐有危舉不爲義兵錄故復錄會

莊二年公子慶父帥師伐於餘邱傳邾婁之邑也不繫邾婁國

之也君存焉爾

九年公伐齊納糾傳納八詞也伐而言納猶不能納也注伐者非八國詞

十四年單伯會伐宋傳後會也

二十八年三月甲寅齊人伐衛衛人及齊人戰衛人敗績傳伐何以日至之日也戰言伐至之日也春秋伐者爲客伐者爲主使衛主之未有罪爾敗不言師未得乎師也注詐戰者不言戰言戰者衛未有罪方欲使衛主見直文

三十年齊人伐山戎三十一年齊侯來獻戎捷傳此蓋戰也何以不言戰春秋敵者言戰桓公之與戎狄驅之爾

僖十七年齊人徐人伐英氏注春秋前黜稱氏也伐國而含氏

言之者非主名故伐之得從國舉

十八年正月宋公曹伯衛人邾婁人伐齊五月戊寅宋師及齊師戰于顓齊師敗績傳戰言伐宋公與伐而不與戰伐者爲客伐者爲主不使齊主之與襄公之征齊也

二十六年公以楚師伐齊取穀注言以者行公意別魯兵也稱師者順上文

二十八年晉侯侵曹晉侯伐衛傳再言晉侯非兩之也不言遂未侵曹也致其意也

文三年晉陽處父帥師伐楚救江傳爲援也

襄十一年公會晉侯宋公衛侯曹伯齊世子光莒子邾婁子滕子薛伯杞伯小邾婁子伐鄭會于蕭魚傳此伐也其言會于蕭

魚菴鄭與會爾

哀十一年公會吳伐齊甲戌齊國書帥師及吳戰于艾陵齊師敗績獲齊國書注戰言伐者魯與伐而不與戰

桓十年十有二月丙午齊侯衛侯鄭伯來戰于郎傳言來戰近乎圍也偏戰不言師敗績內不言戰言戰乃敗矣注魯不出主名者兵近都城明舉國無大小當戮力拒之

十三年二月公會紀侯鄭伯己巳及齊侯宋公衛侯燕人戰齊師宋師衛師燕師敗績傳後日恃外也內言戰從外也不地近乎圍郎亦近矣猶可以地也注親戰龍門兵攻都城尤危故取之績功也取其績聚師衆有尊卑上下次第行伍必出萬死而不奔故以自敗爲文明當坐燕戰稱人敗稱師重師也言及者

明見伐者爲主故得汲汲敗勝之文

莊九年八月庚申及齊師戰于乾時我師敗績傳內言敗伐敗也復讐也曷爲使微者公也不言公不與公復讐復讐者在下也注時實不能納糾伐齊諸大夫以爲不如以復讐伐之非誠心至意故不與也復讐以死敗爲榮故錄之

十年六月齊師宋師次于郎公敗宋師于乘邱傳言次伐也齊與伐而不與戰我能敗之故言次也注二國纔止次未成于伐魯卽能敗宋師齊師罷去故不言伐言次也明國君當強折衝當遠魯微弱深見犯至于近邑賴能速勝之所以強內且明臣子當將順其美匡救其惡

僖十五年十有一月壬戌晉侯及秦伯戰于韓獲晉侯傳君獲

不言師敗績也

二十八年四月己巳晉侯齊師宋師秦師及楚人戰于城濮楚

師敗績

見貶例

三十三年四月辛巳晉人及姜戎敗秦于殽

見貶例月日例

文二年二月甲子晉侯及秦師戰于彭衙秦師敗績注師敵君

不正者賤之不嫌得敵君

七年戊子晉人及秦人戰于令狐晉先昧奔秦傳偏戰不言師

敗績敵也

十二年戊午晉人秦人戰于河曲傳同上

宣十二年乙卯晉荀林父帥師及楚子戰于邲晉師敗績

成元年王師敗績于貿戎傳王者無敵莫敢當也

二十六年癸酉季孫行父臧孫許叔孫僑如公孫嬰齊帥師會
晉卻克衛孫良夫曹公子手及齊侯戰于鞌齊師敗績見王魯
例內外

十六年甲午晉侯及楚子鄭伯戰于鄢陵楚子鄭師敗績傳敗
者稱師楚不稱師王夷也不言師敗績末言爾

昭十七年楚人及吳戰于長岸傳詐戰言戰敵也

二十三年戊辰吳敗頓胡沈蔡陳許之師于雞父胡子髡沈子

楹滅獲陳夏齧

見進
黜表

隱五年宋人伐鄭圍長葛傳邑不言圍言圍強也注惡其強而
無義必欲得邑故如其意言圍

僖六年公會齊侯宋公陳侯衛侯曹伯伐鄭圍新城傳邑言圍

疆也注惡桓公行霸強非所以附疏

二十一年執宋公以伐宋楚人使宜申來獻捷

見諱例

二十三年齊侯伐宋圍緡傳邑言圍疾重故也注襄公爲楚所敗諸夏之君宜雜然助之反因其困而伐之痛與重故創無異

二十六年楚人伐宋圍緡傳邑言圍刺道用師也注以師與魯未至又道用之惡其視百姓之命若草木

成三年叔孫僑如帥師圍棘傳汶陽之不服邑也言圍不聽也注與圍外邑同罪得曰取不得曰圍

襄元年仲叔蔑會晉欒黶宋華元衛甯殖曹人莒人邾婁人滕人薛人圍宋彭城傳爲宋誅也

十二年莒人伐我東鄙圍台傳伐而言圍者取邑之辭也伐而

不圍者非取邑之詞也

見諱例

十八年公會晉侯宋公衛侯鄭伯曹伯莒子邾婁子滕子薛伯杞伯小邾婁子同圍齊十九年公至自伐齊傳致伐未圍齊也言圍抑齊也爲其亟伐也或曰爲其驕蹇使其世子處乎諸侯之上也

昭二十六年公圍成注惡公失國幸而得運復擾其民不從叛書者本與國俱叛不從定公以親圍下邑譏者昭無臣子又卽如定公當致也

定十二年公圍成公至自圍成

見致例

哀三年齊國夏衛石曼姑帥師圍戚傳伯討也

隱二年五月莒人入向傳入者得而不居也注凡書兵者正不

得也外內深淺皆舉之者因重兵害衆兵動則構怨結禍更相報償無已時諸侯擅興兵不爲大惡者保伍連帥本有用兵征伐不義之道

五年衛師入盛傳將尊師衆稱某帥師將尊師少稱將將卑師衆稱師將卑師少稱人君將不言帥師書其重者也

文十五年晉卻缺帥師伐蔡戊申入蔡傳入不言伐言伐至之日也其日至之日也

齊侯侵我西鄙遂伐曹入其郛

見諱例

襄十二年季孫宿帥師救台遂入運注討叛也封內兵書者爲遂舉討叛惡遂者得而不取與不討同取運而自益其邑

哀七年公伐邾婁八月己酉入邾婁以邾婁子益來

見諱例

八年正月宋公入曹以曹伯陽歸見諱例

滅遷潰叛例入誅絕例內外取邑並詳諱例

隱四年莒人伐杞取牟婁見建始例

六年宋人取長葛傳外取邑書久也注古者師出不踰時今宋更年取邑久暴師苦衆居外故疾之不繫鄭舉伐者明因上伐圍取也

襄十九年取邾婁田自鄆水傳以鄆爲竟也鄆移也注諸侯土地本有度數不得隨水隨水有之當坐取邑

次戌例見譏例諱例

莊十八年公追戎于濟西傳未有言伐者其言追大其爲中國追也未至而豫禦之也于濟西大之也

僖二十六年齊人侵我西鄙公追齊師至嚮弗及傳侈也注弗者不之深者也言齊人畏公士卒精猛去之深遠國內兵不書而舉地者善公齊師去則止不遠勞百姓過復取勝得用兵之節

襄十五年齊侯伐我北鄙圍成公救成至遇傳不敢進也注不言止次以刺之者量力不責重民也故與至嚮同文封內兵書者爲不進張本

莊十七年齊人濊于遂傳衆殺戍者也注遂人以藥投於水中多殺之古者有分土無分民齊戍之非也遂不當坐也故使齊爲自積死文也稱人衆詞不書戍將帥者封內兵也

釋曰孟子有言春秋無義戰彼善於此則有之矣征者上伐

下也敵國不相征也然則詳於言兵聖人將以禁暴誅亂而維封建於不敝也夫周之末失強侵弱衆暴寡士民塗炭靡有定止不思其所由失而曰封建使然於是悉廢而郡縣之而天下卒以大壞夫郡縣之法勢不能重其權久其任如古諸侯也一旦奸民流竄盜賊蜂起其殃民而禍及於國秦漢之忽亡晉季之紛擾視三代之衰則慘矣夫王靈不振九伐之法不修則去封建而亂亡益迫王靈振九伐之法脩則建親賢而治道乃久三季之失非強侯失之失馭侯之法也肉袒請刑之意變爲下堂矣采薇治外之制依於晉鄭矣不此之訾而訾封建是因幽厲而廢文武也可乎曰然則春秋救周之敝將奈何曰制國如周初公侯之國不過方百里伯子

男之國不過方七十里如五十里其軍賦之法大國千乘寓
農者十萬人次五百乘次二百五十乘則五萬人及二萬五
千人正羨之卒大國不過二軍小國不過一軍其徵發調遣
之兵方伯不過二師諸侯不過一師小國惟卒旅而已故皆
稱人以聽於方伯其諸侯世子既教於學而誓於天子書曹世子
來朝天子復與之賢師良傅譏錫成公命是也而理軍國者又皆天
子之命卿單伯是也得其人如齊二守晉隨會漢之賈董亦足以
佐治而名山大川毫阪要害之所又皆王官領之犬牙相制
繡壤交錯平治則修朝覲聘享巡守會同之禮一方有警則
元戎十乘以先啟行而飛隼爰集其車三千不勞饋餉而可
立致觀文王之耿光揚武王之大烈雖萬世不敝可也在易

比之二曰比之自內貞吉言建親也其四曰外比之貞吉言建賢也漸之象曰居賢德善俗太公率青周公率兗召公率燕康叔率股其自治皆儉於百里而紂之餘風殄矣二公分陝尙父治內而德廣之所及遠矣賢聖之才不世出則莫若修春秋之制得如齊桓晉文者以爲方伯連帥則滅亡之禍可弭桓恥不能救而侵奪之罪可正文班君國子民求賢審官以輔王室以救中國持世之要務太平之正經詩終殷武之意也

地例第二十六

隱元年公及邾婁儀父盟于昧傳昧者地期也注會盟戰皆錄地其所期處重期也又注凡以事定地者加于例以地定事者

不加于例

四年公及宋公遇于清注地者重錄之

桓十五年十有一月公會齊侯宋公衛侯陳侯于侈伐鄭注不舉伐爲重者用兵重於會嫌月爲桓伐有危舉不爲義兵錄故復錄會

宣元年宋公陳侯衛侯曹伯會晉師于斐林伐鄭注殊會地之者起諸侯爲盾所會

定四年三月公會劉子晉侯宋公蔡侯衛侯陳子鄭伯許男曹伯莒子邾婁子頓子胡子滕子薛伯杞伯小邾婁子齊國夏于召陵侵楚注月而不舉重者楚以一裘之故拘蔡昭公數年然後歸之諸侯雜然侵之會同最盛故善錄其行義兵也

僖十九年夏六月宋人曹人邾婁人盟于曹南鄆子會盟于邾
婁注因本會于曹南盟故以地實邾婁起爲邾婁事也

詳諱例

三十二年衛人侵狄秋衛人及狄盟注不地者起因上侵就狄
盟也

文二年三月乙巳及晉處父盟注不地者起公就于晉也

詳諱例

宣十五年公孫歸父會楚子于宋注地以宋者善內爲救宋行
雖不能解猶爲見人之厄則矜之故養遂其善意

昭九年叔弓會楚子于陳注陳已滅復見者從地名錄猶宋郕
以邑錄不舉小地者顧後當存

襄三年公如晉夏四月壬戌公及晉侯盟于長檮公至自晉注
盟地者不于都也

六月公會單子晉侯宋公衛侯鄭伯莒子邾婁子齊世子光
未同盟于雞澤陳侯使袁僑如會戊寅叔孫豹及諸侯之大夫
及陳袁僑盟注復出陳者喜得陳國也不重出地有諸侯在臣
繫君故就上地

十六年戊寅大夫盟注不重出地者與雞澤同義

莊十九年公子結媵陳人之婦于鄆遂及齊侯宋公盟注先書
地後書盟者明出竟乃得專之盟不地方使上爲出竟地卽更
出地嫌上地自爲媵出地也

桓十二年十有二月及鄭師伐宋丁未戰于宋注宋不出主者
者兵攻都城與卽同義

十三年及齊侯宋公衛侯燕人戰傳不地近乎圍也卽亦近矣

猶可以地也

莊二十八年齊人伐衛衛人及齊人戰衛人敗績注不地者因都主國

僖二十二年宋公及楚人戰于泓注陸戰當舉地而舉水者大其不以水厄人也

文十二年晉人秦人戰于河曲傳曷以爲水地河曲疏矣河干里而一曲也注不言及不別曲直而地以河曲明兩曲也

宣十二年晉荀林父帥師及楚子戰于邲注陸戰當舉地而舉水者大莊王閔墮水而佚晉寇

昭五年叔弓帥師敗莒師于濇泉

見災異例

文十一年叔孫得臣敗狄于鹹

見災異例

隱六年鄭人來輸平

見諱例

隱十一年公薨傳弑也不地不忍言也

桓十八年公薨于齊注地者在外爲大國所殺于國此危國重故不暇隱也

莊三十二年公薨于路寢注在寢地加錄內也夫人不地者外夫人不卒內書薨已錄之矣故出乃地

子般卒注稱卒不地者降成君也

昭三十二年公薨于乾侯

宣九年晉侯黑臀卒于扈傳晉之邑也諸侯卒于封內不地卒于會故地也未出其地故不言會也注左右皆臣民雖卒于會上危愈於竟外故不言會出外死有輕重死于師尤甚于會次

之于人國次之于封內最輕

襄七年鄭伯髡原如會未見諸侯丙戌卒于操傳諸侯卒其封

內不地地隱之也弑也

見中國
諱例

昭二十五年宋公佐卒于曲棘傳諸侯卒其封內不地地憂內也

隱元年鄭伯克段于鄆傳其地當國也齊人殺無知不地在內也在內雖當國不地也不當國雖在外亦不地也注明當國者在外乃地爾爲其將交連鄰國復爲內讐故錄其地明當急誅之

四年衛人殺州吁于濮

昭十一年楚子虔誘蔡侯般殺之于申注地者起以好會誘之

十六年楚子誘戎曼子殺之注不地者畧也

僖十九年邾婁人執鄫子用之傳用之社也注不言社者本無用人之道言用之已重矣故絕其所用處也

昭十一年楚師滅蔡執蔡世子有以歸用之傳蓋以築防也

桓十五年鄭伯突入于櫟傳鄭之邑不言入于鄭末言爾祭仲亡矣

襄二十五年衛侯入于陳儀傳衛之邑不言入于衛諉君以弑也

哀二年晉趙鞅帥師納衛世子蒯聩于戚傳衛之邑不言入于衛父有子子不得有父也

襄二十一年邾婁庶其以漆問邱來奔傳邾婁無大夫重地也

昭五年莒牟夷以牟婁及防茲來奔傳莒無大夫重地也

隱五年公觀魚于棠傳遠也

桓四年公狩于郎傳遠也

五年大雩注不地者常地也

六年大閱注不地者常地也

莊十八年公追戎于濟西傳其言于濟西大之也

僖二十六年公追齊師至檇弗及注國內兵不書而舉地者善

公不遠勞百姓得用兵之節

襄十五年公救成至遇注量力不責故與至檇同文

宣八年公于遂如齊至黃乃復辛巳有事于太廟仲遂卒于垂注地者絕外卒明當有卒外禮也

成十七年公孫嬰齊卒于貍軫

宣十八年歸父還自晉至榿遂奔齊注言至榿者善其得禮

襄十九年晉士匄帥師侵齊至穀聞齊侯卒乃還注言至穀者未侵齊也

昭二年公如晉至河乃復

案十二年十三年二十一年二十三年同見詳例

二十五年公孫于齊次于揚州齊侯唁公于野井注地者臣子痛君失位詳錄所舍止唁地者痛錄公明臣子常憂納公也

隱七年戎伐凡伯于楚邱以歸傳其地大之也注不地以衛者天子大夫銜王命至尊顧在所諸侯有出入當赴其難與國君等也

成十六年晉人執季孫行父舍之于招邱傳仁之也曰在招邱

帑矣代公執也注善其過則稱己美則稱君累代公執在危殆之地故地不稱行人者在君側非出使

釋曰昔子思子之述春秋曰下襲水土說之者謂襲因也謂記諸夏之事山川之異春秋一字皆以制法況會盟戰取書重辭復漢之諸儒每言堯舜禹貢三代所域春秋所治考而列之亦承學之先務矣然余觀傳之言曰器從名地從主人又曰地物從中國邑人名從主人諸侯土地各有封疆里數王者起興滅國反取邑不嫌不明大哉言乎春秋正中外十九國卒葬表十七合王魯十九以張治法自餘雖小國不通盟會戰伐者常畧之而況土地乎曰然則子思子所云襲水土不亦遠乎曰夫何遠之有正封疆以建邦國表山川以設險阻春秋所

治仍三代之治也若因事以定地因地以定事亦重其事而加詳焉爾版圖之要水地之記司徒司馬司空之有司職之豈聖王之事哉是故有所弗學而後其學博有所弗問而後其問審有所弗思而後其思慎有所弗辨而後其辨明屑屑焉天文地理術數兵法之是求亦淺之乎視聖人矣

郊禘例第二十七

僖三十一年夏四月卜郊不從乃免牲猶三望傳三卜禮也四卜非禮也求吉之道三禘嘗不卜郊何以卜卜郊非禮也魯郊非禮也天子祭天諸侯祭土天子有方望之事無所不通諸侯山川有不在其封內者則不祭也免牲禮也免牛非禮也傷者曰牛三望望祭也祭太山河海猶者通可以已也譏不郊而

望祭也

宣三年正月郊牛之口傷改卜牛牛死乃不郊猶三望傳之口
緩也不復卜養牲養二卜帝牲不吉則板稷牲而卜之郊必祭
稷自內出者無匹不行自外至者無主不止注書改卜者善應
變得禮

成七年鼯鼠食郊牛角改卜牛鼯鼠又食其角乃免牛夏五月

不郊猶三望

見災
異例

十年夏四月五卜郊不從乃不郊傳不免牲故言乃不郊也注
當坐盜天牲故諱

十七年九月辛丑用郊傳用者不宜用也郊用正月上辛

襄七年夏四月三卜郊不從乃免牲

十一年夏四月卜郊不從乃不郊

定十五年饑鼠食郊牛牛死改卜牛夏五月辛亥郊傳三卜之
運也注已卜春三正不吉復轉卜夏三月周五月得二吉故郊
易曰再三瀆瀆則不告雖吉猶不當爲也

哀元年饑鼠食郊牛改卜牛夏四月辛巳郊

右郊九條

僖八年秋七月禘于太廟用致夫人

閔二年五月乙酉吉禘于莊公注禮禘祫從先君數朝聘從今
君數三年喪畢遭禘則禘遭祫則祫

文二年八月丁卯大事于太廟躋僖公傳大祫也合祭也毀廟
之主陳於太祖未毀廟之主皆升合食於太祖五年而再殷祭

注親過高祖毀其廟藏其主於太祖廟中禮取其廟室簠以爲死者炊沐太祖周公廟陳者陳列太祖東鄉昭南鄉穆北鄉其餘孫從王父三年祫五年禘禘所以異於祫者功臣皆祭也祫猶合也禘猶諦也審諦無所遺失禮天子特禘特祫諸侯禘則不祫祫則不嘗大夫有賜於君然後祫其高祖

定八年從祀先公傳順祀也注不書禘者後祫亦順

昭十五年二月癸酉有事于武宮籥入叔弓卒去樂卒事

宣八年六月辛巳有事于太廟仲遂卒于垂壬午猶繹萬八圭籥

桓十四年秋八月壬申御廩灾乙亥嘗

桓八年春正月己卯烝傳冬祭也春日祠夏日禘秋曰嘗冬日

烝常事書譏亟也注屬十二月已烝今復烝也

夏五月丁丑烝傳譏亟也注與上祀同爲亟也

案亦譏不時夏祭薄冬祭盛也

右禘祫祠禘嘗烝九條

釋曰昔仲尼遊于兩觀喟然而歎魯之郊禘非禮也是天子之事守也夫杞宋旣不足徵周道則幽厲傷之坤乾之義夏時之等舍魯春秋其奚適矣坤乾雖亡夏時具在正月初歲祭郊也二月祭鯨言祭禘也禘以春夏祫以秋冬皆用仲月郊零用孟月迎氣以朔氣之始天子制也是以春秋于僭入僭則曰大惡諱于僭六羽則曰小惡譏而郊禘獨不諱且譏者春秋天子之事也然則郊禘之僭何昉乎蓋僖公使季孫行父請命于周而始爲之也里革之頌至深切矣其言成王

命伯禽也曰錫之山川土田附庸而已不聞其以天子之禮樂康周公也其言山川也曰泰山巖巖魯邦所詹而已非若龜蒙鼫繹之保有奄有也其言郊禘也曰周公之孫莊公之子惟恐其以非禮非道誣周公也曰春秋匪解享祀不忒魯郊避夏正而間以春秋言匪解微辭也謂卜或不從又有鼫鼠災也曰不忒忒之爲言猶僭也乃申之曰皇皇后帝皇祖后稷享以騂犧是饗是宜降福旣多謂卜不從者唯不宜斯不饗也且以諸侯而欲受天子之福假以溢我誰其收之旣多言弗戢也又申之曰周公皇祖亦其福女益曰皇祖后稷乃天子之皇祖周公乃女皇祖也以禘禮祀其不饗乎秋而載嘗以下譏大事所用也泰山巖巖以下譏三望也令妻壽

母譏尊成風立聖姜也此非與春秋相發者哉昭公將誅季氏子家子以爲不如正己蓋天子微諸侯僭大夫強諸侯脅其勢固然行父方請命于周而桓宮已設私家矣微以雍舞八佾效尤雖甚其孰能禁之故孔子曰周公其衰又曰旣灌而往吾不欲觀之入太廟每事問曰是禮也蓋譏其小者而大者則春秋壹譏云爾惟天子受命于天諸侯受命天子故爲朝天子雖時祭猶有廢闕况敢干大禮以自取戾哉禮之不明國乃滅亡亂賊之禍接跡天下其以此也夫

闕疑例第二十八

隱三年日有食之注不言月食者其形不可得而觀也故疑言日有食之孔子曰多聞闕疑慎言其餘則寡尤

二年紀子伯莒子盟于密傳紀子伯者何無聞焉爾注春秋有
改周受命之制孔子畏時遠害又知秦將燔詩書其說口授相
傳至漢公羊氏及弟子胡毋生等乃始記於竹帛故有所失也
桓五年甲戌己丑陳侯鮑卒傳憾也甲戌之日亡己丑之日死
而得君子疑焉故以二日卒之也

十四年夏五傳無聞焉爾

文十四年宋子哀來奔傳無聞焉爾

昭十二年齊高偃帥師納北燕伯于陽傳伯于陽者何公子陽
生也子曰我乃知之矣在側者曰子苟知之何以不革曰如爾
所不知何春秋之信史也其序則齊桓晉文其會則主會者爲
之也其詞則某有罪焉爾注卽納上伯款非犯父命不當言于

陽又微國出入不兩書伯不當再出故斷三字問之時孔子年二十三具知其事後作春秋案史記知公誤爲伯子誤爲子陽在生刊滅闕夫子欲爲後人法不欲令人妄億錯不足陽下言于北燕者史文也北燕本在上從史文也

釋曰昔夫子有言君子于其所不知蓋闕如也又曰吾猶及史之闕文也今亡矣然則春秋受命制作故首卽改元稱王而兢兢於信史文何哉蓋其所更者皆新義所存由多聞多見而裁乎聖心游夏所莫能贊故曰其義則竊取之矣謂祖述憲章也其所不革者皆義已空貫則闕疑闕殆以明其無我學者所當取法故曰如爾所不知何謂述而不作也聖人之文欲使人疑疑而問問而得乃爲心得闕疑之意又欲使

人信信而執執而固斯莫能破故以其所闕知其無所闕
四年傳是謂善學矣夫子以天縱之聖明天子之事而于策
口備矣書大體猶詳慎如此然則不知而作之者猶欲以郢書燕說
失其真悲夫

主書例弟二十九

隱元年鄭伯克段于鄆注不從討賊辭者主惡以失親親故書
之

天王使宰咺來歸惠公仲子之賵注主書者不及事也
祭伯來注主書者以罪舉內外皆書者重乖離之禍也
公子益師卒注主所以卒大夫者明君當隱痛之也

三年日有食之傳何以書記異也注諸言何以書者問主書

武氏子來求賻注主爲求賻書也

四年衛人立晉注主書從受位也

五年公觀魚于棠注諸諱主書者從實也

莊六年齊人來歸衛寶注主書者極惡魯犯命復貪利也

九年齊人取子糾殺之注主書者從齊取也

十年宋人遷宿注主書者從宋也

十七年鄭瞻自齊逃來傳書甚佞也曰佞人來矣佞人來矣注
重言來者道經主書者若傳云爾

閔元年公及齊侯盟于洛姑注主書者起託君也

齊仲孫來注主書者賊不宜來

僖元年齊師宋師曹師次于聶北救邢注主書者起文從實

案二

年注
同

夫人姜氏薨于夷齊人以歸注主書者從內不絕條

十五年晉侯及秦伯戰于韓獲晉侯注主書者從獲人例

二十四年天王出居于鄭注主書者錄王者所居也

二十五年宋蕩伯姬來逆婦注主書者無出道也案三十一
年注同

楚人圍陳納頓子于頓注主書者從楚納之

二十八年晉人執衛侯歸之于京師注主書者以起文公逐之

三十年衛侯鄭歸于衛注主書者名惡當見

文元年天王使毛伯來錫公命注主書者惡天子也

十五年晉郤缺帥師伐蔡戊申入蔡注主書與甲寅同義

宣十五年宋人及楚人平注以主坐在君側遂爲罪也

十八年歸父還自晉至櫟遂奔齊注主書者善其不以家見逐
怨懟成踊哭君終臣子之道起時莫能然也

成八年晉侯使韓穿來言汶陽之田歸之于齊注主書者善晉
之義齊

十六年曹伯歸自京師注主所以見曹伯歸本据喜時平國反
之書非錄京師有力也

十八年楚子鄭伯伐宋宋魚石復入于彭城注主書者起其事

昭元年莒去疾自齊入于莒莒展出奔吳注主書去疾者重莒

十二年齊高偃帥師納北燕伯于陽注主書者惡納篡也

二十五年齊侯唁公子野井注主書者喜爲大國所唁

二十六年天王入于成周注主言入者起其難也

三十一年黑弓以濫來奔注主書者在春秋前見王者起當追有功顯有德興滅國繼絕世

定元年戊辰公卽位注主書者重五始也

八年盜竊寶王大弓注主書者定公失政權移陪臣拘其尊卿喪其寶玉無以合信天子交質諸侯當絕之不書拘季孫者舉五玉爲重

十二年季孫斯仲孫何忌帥師墮費注書者善定公任大聖復古制弱臣勢也不書去甲者舉墮城爲重

十四年衛世子蒯聵出奔宋注主書者子雖見逐無去父之義

哀二年晉趙鞅帥師納衛世子蒯聵于戚注主書者與頓子同
三年齊國夏衛石曼姑帥師圍戚注主書者善伯討

四年晉人執戎曼子赤歸于楚注主書者惡晉背叛當誅之

十三年公會晉侯及吳子于黃池注主書者惡諸侯君事夷狄

釋曰董生有言春秋辨是非故長于治人文成數萬其旨數

千萬物之散聚皆在春秋又曰詩無達詁易無達占春秋無

達辭從變從義而一以奉人以是知春秋之爲道屢遷而其

義必有所專主其爲文周流空貫不言之眇皆在深察一言

之發衆例具舉是以說者各任其意離其宗何氏之于經其

最密者也既審決詁淫判若白黑而引伸觸類離根散葉貫

穿周顧網羅完具又慮用之者輕重失倫源委莫究輒下宗

義以正指歸竊嘗以爲先漢以公羊斷天下之疑而專門學者自趙董生齊胡毋生而下不少槩見何氏生東漢之季獨能櫟括兩家使就繩墨于聖人微言奧旨推闡至密惜其說未究于世故竟其餘緒爲成學治經者正焉

公羊何氏釋例卷九終

春秋公羊經何氏釋例卷十

武進劉禮部逢祿申受著

災異例第三十

隱三年春王二月己巳日有食之傳記異也曰某月某日朔日有食之者食正朔也其或日或不日或失之前或失之後失之前者朔在前也失之後者朔在後也注象君行外疆內虛故日月之行無遲疾食不失朔也二日食象君行暴急外見畏故日行疾月行遲過朔乃食失正朔於前己巳是也晦日食象君行懦弱見陵故日行遲月行疾未至朔而食失正朔於後莊十八年三月是也是後衛州吁弑君諸侯初僭魯隱係獲公子翬進詔謀

桓三年秋七月壬辰朔日有食之既傳盡也注是後楚滅鄧穀
上僭稱王故尤甚也不書者後治夷狄

十七年冬十月朔日有食之注是後夫人僭公爲齊侯所誘殺

又見月
日例

莊十八年三月日有食之注是後戎犯中國魯敝鄭瞻夫人如
莒淫泆不制所致

二十五年六月辛未朔日有食之鼓用牲于社傳求乎陰之道
也以朱絲營社或曰脅之或曰爲闇恐人犯之故營之注社者
土地之主也月者土地之精也上繫於天而犯日故鳴鼓而攻
之脅其本也朱絲營之助陽抑陰也先言鼓後言用牲者明先
以尊命責之後以臣子禮接之所以爲順也書者善應變得禮

是後夫人遂不制通於二叔殺二嗣子

二十六年冬十有二月癸亥朔日有食之注與上略同

僖五年九月戊申朔日有食之注此象齊桓德衰是後楚遂背
叛狄伐晉滅溫晉里克比弑二君

十五年夏五月日有食之注是後秦獲晉侯齊桓公卒楚執宋
公霸道衰中國微弱之應

文元年二月癸亥朔日有食之注是後楚世子商臣弑君楚滅
江六狄北侵中國

十五年六月辛丑朔日有食之鼓用牲于社注是後楚人滅庸
宋人弑其君處曰齊人弑其君商人宣公弑子赤莒弑其君庶
其

宣八年秋七月甲子日有食之既注是後楚莊王圍宋伐鄭勝晉中國禍奪屈服強楚之應

十年夏四月丙辰朔日有食之注與甲子既同事重故累食十七年六月癸卯日有食之注是後邾婁人戕鄆子四國大夫敗齊師于鞏齊侯佚獲君道微臣道強之所致

成十六年六月丙寅朔日有食之注是後楚滅舒庸晉厲公見餓殺尤重故十七年復食

十七年十有二月丁巳朔日有食之

襄十四年二月乙未朔日有食之注是後衛侯爲強臣所逐溟梁之盟信在大夫

十五年秋八月丁巳日有食之注是後溟梁之盟信在大夫齊

蔡莒吳衛之禍徧滿天下

二十年冬十月丙辰朔日有食之注自溴梁之盟臣忖日甚故比年日食

二十一年秋九月庚戌朔日有食之冬十月庚辰朔日有食之二十三年二月癸酉朔日有食之

二十四年秋七月甲子朔日有食之既注是後楚滅舒鳩齊崔杼衛甯喜弑其君

八月癸巳朔日有食之注與甲子同

二十七年冬十有二月乙亥朔日有食之注是後吳蔡莒弑君之應

昭七年夏四月甲辰朔日有食之注是後楚滅陳蔡弑其君虔

于乾谿

十五年六月丁巳朔日有食之注并十七年食益與字于大辰同占

十七年夏六月甲戌朔日有食之

二十一年秋七月壬午朔日有食之注是後周有篡禍

二十二年十有二月癸酉朔日有食之注是後晉人圍郊犯天子邑

二十四年夏五月乙未朔日有食之注是後季氏逐昭公吳滅巢弑其君僚又滅徐

三十一年十有二月辛亥朔日有食之注是後昭公死外晉大夫專執楚圍蔡

定五年正月辛亥朔日有食之注是後臣恣日甚魯失國寶宋大夫叛

十二年十有一月丙寅朔日有食之注是後薛弑其君比晉大夫叛

十五年八月庚辰朔日有食之注是後衛蒯聩犯父命蔡齊弑君

僖十五年己卯晦震夷伯之廟傳晦冥也震雷電擊也夷伯者季氏之孚也其稱夷伯天戒之故大之也注此象桓公德衰強楚以邪勝正僖公蔽於季氏季氏蔽於陪臣陪臣見信得權僭立大夫廟天意若曰蔽公室者是人也當去之

成十六年甲午晦注此王公失道臣代其治故陰代陽

莊七年夏四月辛卯夜恒星不見夜中星實如雨傳恒星者列星也列星不見何以知夜之中星反也注列星者天之常宿分守度諸侯之象周之四月夏之二月昏參伐狼注之星當見參伐主斬艾立義狼注主持衡平也皆滅者法度廢絕威信陵遲之象時天子微弱諸侯背叛王室日卑星實未墜而夜中星反者房心見其虛危斗房心天子明堂布政之官也虛危齊分其後齊桓行霸陽穀之會有王事

文十四年秋七月有星孛入于北斗傳彗星也言入北斗有中

也注孛者邪亂之氣彗者掃故置新之象北斗天之樞機玉衡七政所出是時桓文迹息王都不能統政是後齊晉並爭吳楚更謀競行天子之事宋齊莒魯弑君之應

昭十七年冬有星孛于大辰傳大辰者大火也大火爲大辰伐爲大辰北辰亦爲大辰注是時周分爲二天下兩主宋南里以亡

哀十三年冬十有一月有星孛于東方傳見于旦也注周十一月夏九月日在房心房心天子明堂布政之庭於此旦見與日爭明者諸侯代主治典法滅絕之象是後周室遂微諸侯相兼爲秦所滅燔書道絕

隱九年三月癸酉大雨震電傳不時也注有聲名曰雷無聲名曰電周之三月夏之正月雨當冰雪雜下雷當聞于地中其雉雖電未可見而大雨震電此陽氣大失其節猶隱公久居位不反于桓失其宜也發于九年者陽數可以極而不還國于桓之

之所致

庚辰大雨雪傳倣甚也注倣始怒也始怒甚猶大甚也蓋師說以爲平地七尺雪者盛陰之氣也八日之間先示隱公以不宜久居位而繼以盛陰之氣大怒此桓將怒而弑隱公之象

桓八年冬十月雨雪傳不時也注周之十月夏之八月未當雨雪此陰氣大盛兵象也是後有郎師龍門之戰流血尤深

昭四年正月大雨雪注爲季氏

僖十年冬大雨雹注夫人專愛之所生

僖二十九年秋大雨雹注夫人專愛之所生

昭三年冬大雨雹注爲季氏

僖三十三年十有二月實霜不殺草李梅實傳不時也注周之

十二月夏之十月也易中孚記曰陰假陽威之應也旱實霜而不殺傷物至當實霜之時根生之物復榮不死斯陽假與陰威陰威列索故陽自實霜而反不能殺也此祿去公室政在公子遂之應

定元年冬十月霜殺菽傳災菽也以異書異大乎災也注異者所以爲人戒也重異不重災君子所以貴教化而賤刑罰也周十月夏八月微霜用事未可殺菽菽者少類爲稼強季氏象也是時定公喜于得位不念黜逐之恥故天示以當早誅季氏成十六年雨木冰注木者少陽幼君大臣之象冰者凝陰兵之類也冰釋木者君臣將執于兵之徵

桓十四年正月無冰注周正月夏十一月法當堅冰無冰者溫

也此夫人淫泆陰而陽行之所致

成元年二月無冰注周正月夏十一月尚書曰舒恆燠若易京房傳曰當寒而溫例實也是時成公幼少季孫行父專權而委任之所致

襄二十一年冬不雨注京房易傳曰旱異者旱久而不害物也斯祿去公室福山下作故陽雖不施而陰道獨行以成萬物也先是比築三臺屢牙專政之應

僖二年冬十月不雨注說與前同

三年春正月不雨夏四月不雨注太平一月不雨卽書春秋亂世一月不雨未害物未足爲異常滿一時乃書一月書者時僖公得立欣喜不恤庶衆比致三旱卽能退避正殿飭過求己循

省百官放佞臣郭都等理冤獄四百餘人精誠感天不雩而得
澍雨故善其應變改政

六月雨傳上雨而不甚也注僖公飭過求已六月澍雨宣公復
古行中其年穀大豐明天人相與報應之際不可不察其意
文二年自十有二月不雨至于秋七月傳大旱之日短而云灾
故以灾書此不雨之日長而無灾故以異書注此祿去公室政
在公子遂之所致

十年自正月不雨至于秋七月注公子遂之所招

十三年自正月不雨至于秋七月注公子遂所致

僖二十一年夏大旱傳記灾也注新作南門之所生

宣七年大旱注爲伐萊踰時也

桓五年大雩傳旱祭也言雩則旱見言旱則雩不見記災也注
苦其能戒懼天災應變求雨憂民之急也旱者政教不施之應
先是桓公無王行比爲天子所聘得志益驕去國遠狩大城祝
邱故致此旱

僖十一年秋八月大雩注公與夫人出會不恤民之應

十三年秋九月大雩注由陽穀之會不恤民復會于鹹城緣陵
煩擾之應

成三年秋大雩注成公幼少大臣秉政變亂政教先是作邱甲
爲窳之戰伐鄭圍棘不恤民之所生

七年冬大雩注先是公會諸侯救鄭承前不恤民之所致

襄五年秋大雩注先是襄公數用兵圍彭城城虎牢三年再會

四年如晉踰年乃反又賦斂重恩澤不施所致

八年秋九月大雩注先是由城費公比出會如晉莒人伐我動擾不恤民之應

十六年秋大雩注先是伐許齊侯圍成動民之應

十七年九月大雩注比年仍見圍不暇恤民之應

二十八年秋八月大雩注公方久如楚先是豫賦於民之所致
昭三年八月大雩注先是公季孫宿比如晉

六年秋九月大雩注先是季孫宿如晉是後叔弓與公比如楚有豫賦之煩也

八年秋大雩注先是公如楚半年乃歸費多賦重所致

十六年九月大雩注先是公數如晉

二十四年秋八月大雩注先是公如晉仲孫獲卒民被其役明年叔倪出會故秋七月復大雩

二十五年秋七月上辛大雩季辛又雩注

見上及日月例

定元年九月大雩注定公得立尤喜而不恤民之應

七年秋大雩注先是公侵鄭城中賊季孫斯仲孫忌如晉圍邲費重不恤民之應

九月大雩注承前費重不恤民又重之以齊師伐我我自救之役

十二年秋大雩注不能事事信用孔子聖澤廢

桓元年秋大水傳記災也注傷二穀以上書災先是桓篡隱百姓悲哀之心既積而復專易朝宿之邑陰逆而與怨氣并之所

致

十三年夏大水注爲龍門之戰死傷者衆民悲哀之所致

莊七年秋大水無麥苗傳一灾不書待無麥然後書無苗注明君子不以一過責人水旱螟螣皆以傷二穀乃書然不書穀名至麥苗獨書者民食最重先是莊公伐衛納朔用兵踰年夫人數出淫佚民怨之所生

十一年秋宋大水傳及我也注詭例書外以見內也先是二國比興兵相敗百姓同怨而俱灾故明天人相與報應之際甚可畏也

二十四年秋大水注夫人不制遂淫二叔陰氣盛故明年復水二十五年秋大水鼓用牲于社于門注大水與日食同禮者水

亦土地所爲雲實出於地而施於上乃雨歸功於天猶臣歸美於君

二十八年冬築微大無麥禾注此蓋秋水所傷就築微下舉水則嫌冬水惟秋無麥禾但言無麥禾則嫌秋自不成不能起秋水因疾莊公行類同故加大明有秋水也此夫人淫泆之所致宣十年大水注先是城平陽取根牟及蘋役重民怨之所生襄二十四年大水注先是叔孫豹救晉仲孫羯侵齊比與師衆民怨之所生

文九年九月癸酉地震傳動地也記異也注傳先言動者喻若物之動地以曉人也象陰爲陽行是時魯文公制于公子遂齊晉失道四方叛德星孛之萌自此而作故下與北斗之變所感

同也不傳天下異者從王內錄可知

襄十六年五月甲子地震注是時梁之盟政在臣下其後叛臣二弑君五楚滅舒鳩齊侯襲莒垂離出奔兵事尤甚

昭十九年己卯地震注季氏稍盛宋南里以叛王室大亂諸侯莫肯救晉人圍邲吳勝雞父升氏立王子朝之應

二十三年八月乙未地震注是時猛朝更起與王爭入遂至數年晉陵周竟吳敗六國季氏逐昭公吳光弑僚滅徐故日至三食地爲再動

哀三年夏四月甲午地震注此象季氏專政蒯賁犯父命是後蔡大夫專相放盜殺蔡侯申伯晉京師楚黃池之會吳大爲主昭五年戊辰叔弓帥師敗莒師于濇泉傳涌泉也注蓋戰而涌

爲異也此象公在晉臣下專受莠叛臣地以興兵戰鬪百姓悲
怨之所致故因以著戰處欲明天之與人相報應之義

僖十四年秋八月辛卯沙鹿崩傳河上之邑也言崩襲邑也爲
天下記異也注襲者嘿陷入於地中土地者民之主霸者之象
也河者陰之精爲下所襲者此象齊桓將卒霸道毀夷狄動宋
襄承其業爲楚所敗之應

成五年梁山崩傳河上之山也梁山崩壅河三日不流爲天下
記異也注故不日以起之山者陽精德澤所由生君之象河者
四瀆所以通道中國此象諸侯失勢王道絕大夫擅恣爲海內
害自是之後六十年之中弑君十四亡國三十二故梁梁之盟
徧刺天下之大夫

隱五年螟傳記災也注災者有害於人故隨事而記者先是隱公張百金之魚設苛令急法以禁民之所致

八年螟注先是有狐壤之戰中丘之役又受邠田煩擾之應

莊六年螟注先是伐衛納朔兵厯四時乃反煩擾之所生

桓五年蠧傳記災也注煩擾之所生與上旱同說

僖十五年八月蠧注公久出煩擾之所生

宣六年八月蠧注先是公伐莒取向比如齊所致

十三年秋蠧注先是新饑而使歸父會伐莒賦斂不足國家遂虛下求不已之應

十五年秋螽注從十三年之後上求未已而又歸父比年再出會內計稅畝百姓動擾之應

冬螽生傳螽生不書書幸之也猶曰受之云爾上變古易常應是而有天災其諸則宜於此焉變矣注宣公能受過變將明年復古行中冬大有年其功美過於無災故變螽言螽以不爲災起其事

襄七月八月螽注先是邾小邾婁來朝有賓主之賦加以城費季孫宿如衛煩擾之應

哀十二年冬十有二月螽傳記異也注螽者與陰殺俱藏周十二月夏十月不當見故爲異比年再螽者天不能殺地不能埋自是天下大亂莫能相禁宋國以亡齊并於陳氏晉分爲六卿十三年九月螽注先是用田賦又有會吳之費十有二月螽注黃池之會費重煩之所致

宣十年饑傳以重書也注民食不足危亡將至明當自省減開
倉廩贍振乏

十五年饑

襄二十四年大饑注有死傷曰大饑無死傷曰饑

桓十四年秋八月壬申御廩災傳記災也注火自出燒之曰災
先是龍門之戰死傷者衆桓無惻痛之心不重宗廟逆天危先
祖鬼神不饗故天應以災御廩

僖二十年五月乙巳西宮災傳小寢也魯子曰以有西宮亦知
諸侯之有三宮也何以書記異也注西宮者小寢內室楚女所
居也禮諸侯娶三國女以楚女居西宮知二國女于小寢內各
有一宮也禮夫人居中宮少在前右媵居西宮左媵居東宮少

在後是時僖公爲齊所脅以齊媵爲嫡楚女廢在西宮而不見
恤悲愁怨曠之所生也言西宮不繫小寢者小寢夫人所統妾
之所繫也天意若曰楚女本當爲夫人不當繫于齊女故經亦
云爾

成三年甲子新宮災三日哭傳宣公之宮也謂之新宮不忍言
也三日哭禮也記災也注謂之新宮者因新入宮易其西北角
示昭穆相繼代有所改更也此象宣公篡立當誅絕不宜列昭
穆成公幼少臣威大重結怨強齊將不得久承宗廟之應

定二年夏五月壬辰雉門及兩觀災傳其言及兩觀微也不言
雉門災及兩觀主災者兩觀也後言之不以微及大也記災也
注雉門兩觀皆天子之制門爲主觀爲飾故微此本子家駒諫

昭公所當先去以自正者昭公不從其言卒爲季氏所逐定公繼其後宜去其所以失之者故災亦云爾

哀三年五月辛卯桓宮僖宮災傳毀廟也言災復立也不言復立春秋見者不復見也不言及敵也記災也注災不宜立

四年六月辛丑蒲社災傳亡國之社也蓋擯其上而柴其下記災也注戒社者先王所以威示諸侯使事上也災者象諸侯背天子是後宋事強吳齊晉前驅滕薛夾轂魯衛驂乘故天去戒社若曰王教滅絕云爾

文十一年冬十月甲午叔孫得臣敗狄于鹹傳狄者長狄也兄弟三人一者之齊一者之魯一者之晉其之齊者王子成父殺之其之魯者叔孫得臣殺之則未知其之晉者也其言敗大之

也其日大之也其地大之也何以書記異也注以日嫌夷狄不能偏戰也長狄之三國皆欲爲君長大非一入所能討興師動衆然後殺之如大戰此衆周室衰禮義廢大人無輔佐有夷狄行事以三成不可苟指一故自宣成以後弑君二十八亡國四十

莊二十年夏齊大灾傳痢也外灾書及我也注痢者民疾疫也邪亂之氣所生是時魯任鄭瞻夫人如莒淫泆齊侯亦淫諸姑姊妹不嫁者七人

案痢與癘同癘者癩也齊宮女市女闕七百之應

宣三年正月郊牛之口傷改卜牛牛死乃不郊猶三望傳言之口緩也注不若食角急也別天牲主以角書者譏宣公養牲不謹敬不潔清而灾

成七年正月饑鼠食郊牛角改卜牛饑鼠又食其角乃免牛注
易京房傳曰祭天不慎饑鼠食郊牛角書又食者重錄魯不覺
寤重有災也

定十五年正月饑鼠食郊牛牛死改卜牛傳不言所食漫也注
漫者徧食其身災不敬也不舉牛死爲重復舉食者內災甚矣
錄內不言火是也

哀元年正月饑鼠食郊牛改卜牛注災不敬故

莊十七年冬多麋傳記異也注麋之爲言猶迷也象魯爲鄭瞻
所迷惑言多者以多爲異

十八年秋有蜮傳記異也注蜮之猶言惑也其毒害傷人形體
不可見象魯爲鄭瞻所惑將以大亂而不能見也言有者以有

爲異

十九年春有蟲傳記異也注蟲者臭惡之虫也象夫人有臭惡之行言有者南越盛暑所生非中國之所有

昭二十五年有鸛鵒來巢傳記異也其中國之禽也宜穴又巢也江來居此國國將危亡之家鸛鵒猶權欲宜穴又巢此權臣欲國自下居上之徵其後季氏逐君

哀十有四年春西狩獲麟傳記異也非中國之獸也孰狩之薪采者也以狩言之大之也麟者仁獸也有王者則至無王者則不至有以告者曰有麋而角者孔子曰孰爲來哉孰爲來哉反袂拭面涕沾袍顏淵死子曰噫天喪予子路死子曰噫天祝予西狩獲麟孔子曰吾道窮矣注麟者太平之符聖人之類時得

麟而死此亦天告夫子將沒之徵必止於麟者欲見撥亂功成于麟猶堯舜之降鳳皇來儀故麟於周爲異春秋記以爲瑞明太平以瑞應爲效也

僖十有六年春王正月戊申朔賓石于宋五是月六鵠退飛過宋都傳外異書爲王者之後記異也注王者之後有亡徵非親王安存之象故重錄爲戒石者陰德之專者也鵠者鳥中之耿介者皆有似宋襄之行欲行霸事不納日夷之謀事事耿介自用卒以五年見執六年終敗如五石六鵠之數天之與人昭昭著明甚可畏也於晦朔者示其立功善甫始而敗將不克終故詳錄天意也

文三年雨螽于宋傳死而墜也爲王者之後記異也注不言如

兩言幽益者本飛從地上而下至地似雨尤醇衆死而墜者羣
臣將爭彊相殘賊之象是後大臣比爭鬪相殺朝廷久空益由
三世內取責近妃族禍自上下故異之云爾

宣十六年成周宣榭災傳成周者東周也宣榭者宣官之榭也
樂器藏焉爾外災何以書新周也注後周分爲二天下所名爲
東周成周者本成王所定名宣王廟不毀者有中興功室有東
西廂曰廟無東西廂有室曰寢無室曰榭天子之居稱京師宋
災不別所燒新周故分別有災不與宋同也

襄九年春宋災傳大者曰災小者曰火爲王者之後記災也注
是時周樂已毀先聖法度浸疏遠不用之應

三十年五月甲子宋災伯姬卒注伯姬守禮含悲極思之所生

昭九年夏四月陳火傳陳已滅矣言陳火存陳也曰存陳悌矣
注災異爲有國者戒已滅復火者死灰復然之象此天意欲存
之故從有國記災

十八年夏五月壬午宋衛陳鄭災傳異其同日而俱災也外異
何以書爲天下記異也注四國天下象也是時王室亂諸侯莫
肯救故天應以同日俱災若曰無天下云爾

右日食三十四晦二星變四震二雨雪兩雹各三霜二
雨木冰一無冰三不雨七大旱二大雩二十大水十地
震五地陷山崩水涌各一螟三螽九饑三無麥苗一大
無麥禾一火六人疴一疾疫一牛禍四蟲禽獸災四雨
一蠛生一有年一大有年一麟瑞一外災異八凡一百

四十五條

釋曰災異者聖人所以畏天命重民命也聖人之教民先之以教而後誅隨之天之告人主先之以災異而後亂亡從之其任教而不任刑一也六經皆言災異詩禮師失其傳伏生之于書京房之于易董仲舒劉向之于春秋大義略同惟劉歆爲異其于天人相與之際皆能精微眇以喻其意通倫類以貫其理則皆措之于事而可行非槩以恐懼修省之言惑當世也夫陳說先王而失譴告之指謂之不學無術魏以後儒者是也諱其事應之著而不肯感言于上謂之曲學阿世谷永翼奉之徒是也善乎董生之言曰春秋之所譏災害之所加也春秋之所惡怪異之所施也推此以應變是謂求病

而用藥聖人撥亂反正尤重于上律天時下襲水土必至于
太平以喘應爲效而後地平天成之道著則莫近諸春秋也
故觀信宣之覺寤而功美過于無災其召沴而不知變則傷
敗亦不還日天之所壞不可支也易中享傳有之政不改而
災自除者觀本所起以知存亡謂有賢者持政明天意去此
鄉來者是莊王以天不見災地不見孽則時之于山川蓋謂
此也故遇災而懼中主優爲之不見災而懼則并致災之由
而弭之禍祥畢致而王道終矣夫聖主尙樂求忠臣之諫而
況天譴乎樂天者保天下幸之受之之謂也詩曰潛雖伏矣
亦孔之灼故人受陰陽之氣以生若水之漸魚也魚拂鬱于
淵而水爲之淖人以邪亂彼氣化而天聞其腥天之在人者

曰性人之受天者曰命存心養性所以事天而先後之動靜
順逆之氣朕于不聞不覩而樞機之應若山川出雲而天降
時雨因其厚薄廣狹而爲之量詩又曰上天之載無聲無臭
言致一也人君自仁愛而天仁愛之人君自昏昧而天亦應
以昏昧而仁愛之詩又曰民今方殆視天夢夢旣克有定靡
人弗勝有皇上帝伊誰云憎言事天也

工部都水司郎中臨川李秉綬刊

公羊何氏釋例卷十終